



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

17. Kalenderwoche – ab 25. April 2010

De Hardmannbrigge

Wissn Sie was dor Unnorschied zwischn Affnzirgus un Reschdsschdaad is? Na, dor Reschdsschdaad is lusdischor!

Is doch wahr! Was in de Gerischde andauornd fiehr lusdisches Zeusch vorhandeld wern dud... ! Zum Beischbiel hammse jedzde vorhandeld, ob mir Osis e eischnschdändischor Volgsschdamm sinn. Un das Urdeel - nadiherlich von de Wessis gefälld! - mir sinn kee eischnor Volgsschdamm! Fiehr sowas wern nu hunnorde gudbezahlde Leide beschäfdischd!

Odor ooch in Dräsdn... - da had das oborschde Gerischd daderdriebor vorhandeld, ob e Aggdbild, was de Dräsdnor Oborbirschorme esdorin darschdeln dud... - naggsch! Bei Aggdbildor sinn ja de Leide immor naggsch! Also, da had das Gerischd vorhandeld, ob das Aggdbild von dor Frau Orrosch gezeischd wern darf odor ob nisch!

Nee, also erschdensma - hamm die werglich keene wischdischoren Fälle, die vorhandeld wern missn? Un zum zweedn... - wenn se nu schon sowas vorhandln dun, dann missdn die doch wenischdens e Urdeil fälln, was vorninfdisch is. Nee, die hamm endschiedn, dass das Aggdbild gezeischd wern darf. Geeschn dähn Willen von dor Frau Orrosch! Weeschn dor Freiheit in dor Kunsd! Hä? Das is doch...! Wo dud denne da das Bersehnlichkeidsreschd bleim? Wenn misch eenor geeschn mein Willn naggsch maln darf, das darf dähr doch nisch!

Nee, das is doch zum Biebn! Wobei de Frau Orrosch nadiherlich niemals eene bessre Wärbung

fiehr sich hädde machn kenn, als wie mid dähm Dheador um das Aggdbild! Jedzde is die werglisch bundesweid bekannd gewornd! Die had jezde de besdn Schangsn, dass se de Angela ableesn kann! Warum dud misch nisch ma eenor naggsch maln? Da kennde isch dann villeischd dähn Wesdorwelle ableesn! Wobei isch dann allordings drozdähm bei meinor Gudstn bleim däde!

Un nu in Gemnidz... - de Hardmannbrigge! Da hammse de Baudädischgeid eingeschedelld, weil erschd langwierisch vorhandeld wern muss, ob da währ Schadnersadz grischn kann odor nisch? Odor worums ooch ledzdendlich gehn dud - is ja ooch egahl! Dasses irschendwie um Geld gehn dud, is eh glahr! Abor wie is denne sowas meeschlich? Da dun die de Baumaßnahme off Eis leeschn un fang in allor Seelnruhe an mid Vorhandeln! Villeischd e ganzes Jahr odor längor! Währ weeiß, in wieviele Inschdanzn die Sache gehn dud! Als wie wennis hier um irschendeene Schdreidischkeid zwischn Hinz un Kunz gehn däde! Nee, hier is doch abor eene Haubdschlachador von unsoror Schdadt bedroffn! Da ham die sisch doch wenschdens ma e bißl zu beeiln, wennse nu schon unbedingt vorhandln missn! Als däds keene Egsberdn un Gudachdor gähm, die rausgrischn kennndn, wer da an dähm Schadn Schuld ham dud! Warum muss de Baudädischkeid eingeschedelld wern? Die Brigge muss so odor so widdor hähr! Nee, Reschdsschdaad un Vornunfd sinn ooch zwee Sachn, die sisch wahrscheinlich geeschneidisch ausschließn dun!

Eduard Sachsenmeyer